

ANGNI RINGANIRANG

B.S. BANGSHALL

ANGNI RINGANIRANG

B.S. BANGSHALL

Rs. 50.00

Segimin Katta-bichongrang

1.	Tura Jilla	I
2.	Saksa Sakgni	11
3.	Simsang	12
4.	Bol.....	16
5.	Ama	18
6.	Ka·saani Nok	19
7.	Bewaltang	20
8.	Chimongmano,.....	20
9.	Japinapa	21
10.	Anga Bi·sa	21
11.	Re·ba P'·lakan Re·ba	22
12.	Rasong On·na Salsa.....	23
13.	Galatbo Dukrangko	25
14.	An·ching Mitelna.....	27
15.	On·atenga Salamko	27
16.	Robo An·senge Songtango	28
17.	A·chikrangna	29
18.	Sakantian A·chik Jatna.....	30
19.	Nitogipa 'Song	33
20.	Ching A·chik A·song	34
21.	O, Ang A·chik A·song.....	35
22.	Nang·na A·chik A·song	36
23.	Chingni Dongram	38
24.	A·chik A·bri	39
25.	Song Chel·ao.....	40
26.	Ku·rangtangchi.....	41

27.	Okamenga Pilakko	42
28.	Dukrangko Amtoke (27-06-1964)	43
29.	Jagring Teng-surikgen	44
30.	Pattigimin Rasong	45
31.	Ritimkari.....	46
32.	Ekangani	49
33.	Karitangna Bils Sokon.....	52
34.	Gokarek-gok	53
35.	Gachioba An·senga	55
36.	Dongode Ang Baksa.....	56
37.	Dongode Un Baksa.....	56
38.	Re·ba P'lak Nomil-Panterang	57
39.	Ring-choe Saksanjok	58
40.	Ohoma	60
41.	Gogaiwai, Gosaiwai, Direngwai	61
42.	Salsamangmang An·sengna	62
43.	Sikatang	63
44.	Mikkangtango gita	64
45.	Saksan Sikdikdik	65
46.	Jarani Kore Doka.....	67
47.	Cha·asia (“Ritimkari”	69

poedooniko ra·ongkatgimin)

JANAPANI

Ian baksa anga an·tangni sechimonggimin ku·maraprangko ba poedo-rangko “ Angni Ring·anirang” ine minge chapa-ka·e nakatatenga. Ring·anirang ine minga, maina iano segimin-rangoni bang·akon sul·hikote ba badiaba sulrangna ma·keatesa seaha; aro jerangnan sul-on·jaha indakgiparangkoa ku·marap mingtona gitasa seaha.

Indiba iano segiminrang gimikkon ku·marap ba poedo gita seahani gimin, sul gnanggipa ong·oba ba ong·jaoba, seani miksonganiko pilakan ma·sigen, maina bang·bata seanirangon jakkalronggimal A·chik kattarangkosa jakkalaha. Indiba gisikni aro skiani mangsonganiko ma·sina nanggniba dongkugen.

Iano nakatenggipa ku·maraprang, a·songtangni, songsarni, toromni, gisikni, ka·saani, A·chik-chrokmesaani aro gipin gipin chanchiani bidingo sechimonggiminrang ong·a. Haida, uarang sanaba sanaba me·sugen aro sanaba me·sujawa; mande sakantini kaman indaken ong·a. Manderangsa bichalgen.

Tura, July, 1967
B S. Bangshall

Published by Mrs. Sunilla G. Momin, W/o Lt. B S. Bangshall
Financed by Department of Arts and Culture, Shillong, Meghalaya

Dedicated to

Lt. Bettino G. Momin
Lt. Billyno G. Momin
Lt. Ben Carlo G. Momin

TURA JILLA

1. Dura 'bri A·chik mikkim
Chenggontaltal simdim simdim,
Dura Nokrek a·biding,
Peng·pat-suet gongding-ding;
Sakchi aram pa·chapchap,
Guuri mrik ja·chapchap;
Songreango songdu chijol
Nikwatenga kosak joljol.
2. Dura 'bri kimbe ta·srñ-
'Bri kosakon balwa balsri,
Uni ja·pa ja·reko,
Ga·nangpaja biapo,
Makkre bondan' roramo,
Songjok A·chik jilako
Biming minge Tura-ko,
Silpajaoba mingsinga,
Jatko mikgaoatchenga.
3. Chengo skang chasongni,
Manda Simsang chijolni,
Chatro ku·simangtingrang,
Nomil rongrong-silsilrang,
Lekka skitokchenga inja·on,
Isol torom rikchenga Tura-on.
4. Bilsi sokon chengode,
Skul chuti ong·ode,
Gingsirippangtokaijok

Songchi re·na inode;
“Me·gong baljok an·sengjok
Songtangtangchi re·panok.”
Ine ring·angjokode
Beng·o·kangon man·jajok,
Chatrirangba ja·chapchap,
Nirikoan nikjajok.

5. Chengo unomitingde,
Songadamni mandede,
Tura·chini inode,
Chatro·chatrirangkode,
Mande ra·sotokbea,
Chatimole nibea:
Duti·chadol bokako
Teng·supile nikana,
Kini rama chitara
Do·pa chiring gandana.
A·chik torom rikchengram Tura
Ma·-pagitcham skiram jilla.
6. Jilla·nokap o·daldal
Saheb·suba a·gital,
Mande nokba jelkuja
Bangal·Rori sokkuja;
Jilla buring bolgrimgrim,
Si·indikdik ka·sinjrim,
Do·o·matni ku·rangni jikjakan
Bolrikeo amakrang pen·panpan;
Chandmari, Tura bajar Hawakana·ba
Tura Mission a·damba, Katcharini nokapba,
Da·o gita ong·kuja,

Chengmangmangaipitichim;
 Biap-bicham minkuja
 A·dal pe·a gandachim.
 Ja·manosa jelbajok,
 Mande nokba bing·bajok.
 Bangal-Rori sokbajok,
 Songdong a·chatokejok-
 A·chik 'songni jillao
 An·ching baksa Tura-o !

7. Unormiting chasongde
 Gisik an·saotokbea,
 Cholon-rokom bewalrang
 Ma·gap-ma·gap nambea:
 Rori gita duti gane kitap jakbitange,
 Skitoka-poraitoka chatroranga krenge.
 Bengali-ni oikor-rangchi A·chikkuko sea
 Un baksa Engraji ku·koba skia.
 Normal skul matchotede u'mang poraitoka,
 Unikoa 'master'ni kamko am·e ka·a.
 Gisik wa·satokbea, nio mikkim chabea,
 Skiani bang·pajaoba lekka-pora man·bea.
 Cha gitchak gisep gisep toka gita ringa,
 Cha-daka chinirara ka·sitange chi·a.
 Chatriranga riking bangsi dakmandako gana,
 Chadol chine, to nonge kini rama chita-
 Chasong giticham chatrirang,
 A·chik ama-ambirang!

8. Mankachor sorokchipak donga Hawakana,
 Dak bangala kosakchiko minga Babupara;
 Chatrirangni dongramoni sakachina kingking,

Ringre chiring samsajoljol Chandmari a·ding:
 Niwattoa rona nama balwa pangsang-pangsang,
 Gandrak chiring nalsachipak gittimde Wadanang.
 Kosakchipak dika bata buring il·gim-il·gim,
 Ringre chiring jakasichi donga Ringre gittim.
 Sanram nok ge·sakode minga Kala-ajar,
 Dalu sorok an·pachake donga Nakam bajar.
 Biming minga uamangde
 Bang·a gitim nokapde,
 Jilla buring gisepo dongoba,
 Chonmangmanga ong·jasa Tura-ba.

9. Tura jilla antikode Sonibalo cha·a,
 Warekdimdim jikjak-jikjak bang·an mande soka;
 Ajong, Rori, Bangal, Nepal aro A·chik mande
 Anti cha·a napsepsepe bang·a nomil-pante.
 Da·nang gose A·chikrangde samjak-bijakkosa,
 Pala gal·da, me·cheng, baring aro me·jakkosa.
 Palo palo nangjaode gale katangaijok,
 Indinari manderangsa ga·belbele galjok.
 Ba·ra-kancha, cha-chini, to-sabonrangko,
 Indioba Bangal-Rori pala dokanrango.
 Tangka mona suake Rorirangsa badinga,
 Dokan ate asonge cha·e bikma dal·onga.
 A·chikrang-ni a songo,
 An·ching Tura jillao.

10. Chi nama manchakode aiao maiko jegen,
 Nikpagijagiparangde “bebemasai” ingen;
 Sapporiri grikjangjang chiringni chi joka,
 Mikka jakra wachengosa kimongdildil daka.
 Chianingni chikoba siltong teke suaia,

Dimchang a·chang banoba siltong sokna guala.
 Balroroni salode, balsalakmitingode,
 Sala ko·rang rakana chiring ran·changjokode;
 China ma·brangtokbea, me·chik·desa neng·bea,
 Basing dokpingpingari chasekseke am·bea.
 Siltong chi·tekramo mande soka bakdapdap,
 Basing, me·dik·sam·dikrang rikking·rikkang
 dandakdak;
 Manggisiko nikana sogin timola gita,
 Samjanggiko kanatna seksektokenga gita.
 Ding·olana atamchipak re·angoba auna,
 Asongtime sengtimani ajamkuakpil·a.
 Joka Ringre ringrote,
 Tura jilla ma·ate!

11. Nokantian Nokaptango Ki·gong jamgop pintoka,
 Mandeska mandesa toka gita galoka.
 Pring salchukalosa galokgipa sokbara,
 Moelako toktoke ki·gong samo galbara
 Unomiting manchade dimak sengdobagen,
 Gingting rim·tip·rim·tipe bi·sa·desa chaksogen.
 Pringni ua somoion goalaba sokbagen,
 Dingdet·dingdet baltinko ripeesa palbagen;
 “Tika·paltu” palronga goalarang sekseke,
 A·chang·dimchang biapo chigittangko rudape.
 Naba tol·a inode sing·e nibo ui·gen,
 Badiaba chipakde ong·bebea indaken·
 Chingni Tura jillao
 A·chikrangni songjinmao!

12. Jilla nokap ‘bri sako songdu hijol nikwata,
 Dapbek·chiwek dakpaja, sara·nokra a·sata.

Bate rotobatgenchim rama minikjangode,
 Sorok pekwatgiparang Tura jilla ma·ate;
 A·kong a·dap chirama bi·sa·desa re·toja,
 Chiring noksik batsotram rama ga·battopaja.
 Mikka jime waode chiring chikol ta·raka,
 Da·nang mitam bi·sako rengbong rengbong balpaka.

13. Songjinmani manderang atam balwa ringronga;
 Chandmari sorokko warekdimdim weronga-
 Do·o bilbaa gita motor gari deldikdik,
 Re·baode sorokko katna nangjok rang·gitik:
 Sorok a·dam gitchete wate katna nangaha,
 Bi·sa·desa jagoke a·sam bame chakaha.
 Sorok bimong jatchio badiaba jolode,
 Ring·chona nampila mikka jime waode:-
 Jutarangko okgalesa uko re·na nangen,
 Ba·ra·kancha kikdoesa sosichopchop batgen.

14. Sorok a·dram guarerang badiaba chua,
 Sanibani matchurangde ga·akone sia.
 Sonibalni salode, bajar ramachipakde,
 A·pal re·an dandakdak seengchipa dimakmak;
 Gingting rumal rim·tipe re·pakgipararasa,
 Maiba soenga gita ku·songdodo dakesa.
 Jilla nokap kosako,
 Ga·nangpaja biapo;
 Rogimale ronapa
 Chingni Tura Jillao!

15. Nokap·biap kangtoka a·ba o·pata gita,
 Nigamatariode a·chang gita nikata.

Buring dimchang inemung saoba
 sing-rokjokode,
 Amikani nokapsa inataijok seng-sote.
 Skang mande gitchamrang nokap-bari o-toka,
 Man-atangtang sikatang bang-e-bang-e kangtoka.
 A·ding a-patalosa A·chikrangde dongtoka,
 A·dap soroksamkosa Bangal-Rori sekseka.
 Man-atoktok cha-atok a·ding balwa ringari,
 A·chikrangde raktoka bijak na·kam cha·ari
 Nokking bing·tiptipode balwa ringna man·jawa,
 Uko chanchiatode jilla gipin sokjawa;
 A·chikrangni jillako
 Biap balwa namako.

16. Manden' man-e cha-ako nokan-jaman paraka
 A-song sila-siljako ramarangchi pinika.
 Rama sorok mitamko bijolichi ching-ata
 Teng-rakjaoba mesokna sandiode nikata.
 Sorok pekwatgiparang Tura jilla jatchio
 Andalenga mitamrang jajong jabitchimao,
 Kana dikdaka gita badiaba jolrango,
 Bari bolgrim andalsim rama noksik gonggeo;
 Nokjatchio so-gipa chakki dimela gita
 Jrangchipe nikpaja tochi ran·changa gita.
 'Bri kosako rikgipa jilla,
 Jeba ong·bo Bimingde dal-a!
17. A-sel nange kamchonjok Chandmari dokanrang,
 Wal-sareo gimajok pilak gam-jinrang,
 Maming ong·ja indiba skangnade nambate,
 Sengdoatjok nakrangko riting riting ma·ate;

A·belati ginchichi repidape rakata,
 Songdogimin nokrangko apsan minikjangata.
 Jolsa gol·torakosa nokantian jakkala,
 Miktorachi toesa kuturiko suala.
 Aro nitobatgenchim noksam rongtalbatode,
 Apsan rokom gandingko ‘dokandarrang ganode.
 A·chikrangni songjinmao,
 Tura-Chandmario.

18. Tura jillao dongpara gisep balwa ringpana,
 ‘Parade’-kana, ‘Tura Park’ aro Hawakhana.
 Skang chasong gitcharno ‘Tura Park’ko mingsinga,
 Atam balwa ringpana chatro-chatri jinronga:
 Na·tok gitachak kongtokrangko pokkriosa jila,
 Riting riting nitoriri bibalrangba bala.
 Samsirangba tangsekgilgil nina nitobea,
 Roram biap gisep gisep boldim mojimbea.
 Boldimrangni mitamrangde da·o ma·piltokjok,
 Ja·pangosa salakimna ding·kario rojok.

19. Indioba da·ororo aro mingsa donga,
 Andalmandik do·ki-dangdik nokningosa roa;
 Atamantin mande jinma ‘jawilwat’-ko nia,
 Noksa-jagring jipjangako nina paisa on·a;
 Balwa ringa nokningosa gijip wilwilate,
 Chakna nanga ki·sioba gingtingko rim·tipe.
 Dongna nanga iarangba Tura jilla ma·ate,
 Un baksa roram bari nitoriri dongode,
 An·sengramrang Tura-o,
 A·chikrangni jillao

20. Pringode niriktokbo chatro-chatri jinmako,
 Re·angako skulchina Chandmari sorokko-

lling-illap balbring bring chadol paksuete,
 Gitcak-ripet gane-chine mitam ku-chimite;
 lekka-kitap jakbitange, jako chatta ra-e,
 Seng-su seng-su, man·su-man·su mitam beri ringe,
 Re·angtoka jikjak-jikjak rama sorok joljol,
 Kenmangija jakgitele ong·ja gisik nokkol.
 A·brin' dedrang ma·ate, nama da·nang namade,
 Un baksa lekka-bida gisik seng·paode.

21. "Tura Peak'-chi 'picnic' cha·na umang re·angronga
 Sike-moe, doke-dame an·sengangtokbea;
 Mongsongbate matchotmano bilsin' porikako,
 Songtangtangchi ekgriktokna tom·ani ja·mano.
 Gingsi ripang, balwa pang·sang kusi ong·tokbea
 Do·jinma jaksa ganda gisik an·saobea.
 Porikkani biterangko kinaatjokosa,
 Simsakjae dukko man·a mitamrang unosa.
22. Ganding-chinding, mikang-bimang chasong rikna
 namjok,
 Indioba mikchikkima bewalrang sokjajok.
 Miksongani nisantangko bang·an jaktuatjok,
 Balbojengjeng, ritcheng ritcheng poraitokarijok.
 Tura jilla skulni chatro-chatrirang,
 Chasongrikrik chasongna mikkanggiparang;
 Poraitoka Tura-o
 A·chikrangni jillao!
23. Songjinmani manderangde dal·a chona donga,
 Rokom rokom, dingtang dingtang kamrangko ka·a;
 A·chik ripeng me·aparang ku·mong-nanggrimbea
 Torom kamna, songsar dilna gisik nangtokbea.

Sokachakna alnamako maikomancha jegen,
 Gipin jatrang nikeode aiao inmanpilgen.
 Dikdik ropakangoba on·gen gue·pankode,
 Asong-dengdengsrapgijan dakataigen chakode;
 Da·nang basakobasa nokni mande agangen,
 “Chini bon·jok” ineming babilisiko chipbagen.
 Noksul-songsul rogrikronga golpo-soppo ka·e,
 Ku·gep ku·gep ja·momoe gue moja cha·e.
 Donga dipet on·akode cha·simsimangaigen,
 Roa dipet ettalgrike golpo ka·angaigen;
 Mongsongbate mitamrang, da·nang ma·pagitchamrang,
 Watna-engna man·jaha, ma·pilgimin bewalrang.
 Songjinmani padotrang,
 Tura jillan’ A·chikrang!

24. Turan’ me·chikmarangkode aiao maiko jegen,
 Pilak kamon damsan damsan ku·mong nangrimtokgen.
 Dingtangmancha gilja ka·e namen an·saotoka,
 Kusi ong·e golpo ka·e tomdak tomdak roa.
 Salko minge ba·ra sikna dona dingtangmancha
 Sikna-kona skigipa chatrirang gitasa.
 Ba·ra chola sikkiminko dandak dandak pala,
 Nama-namja kingtalgija chasekseke kola.
 Gisik nanga dakchakpana pilak nama kamo,
 Chanchienba jakgitele onatja rasongko;
 Indioba rasong batja bang·e noktangtango
 Manpajaode namatpana nokni bi·sarangko.
 Ja·pang ja·dil nama bitchil chagen nokningoni,
 Dal·ahaosa rasong chugen nokni ma·gipani.
 A·chik a·song gimikna,
 Tura jilla seng·atna.

25. Tura 'bri simdim simdim,
A·chik rasong, A·chik mikkim.
 'Bri kosakni seng·a gipchong,
 "A·chik" biming tangbangpachong
 Pagitchamni rasong,
 Chukan-dongkam chasong chasong.

SAKSA-SAKGNI

1. Rikoba rikrak,
 Man·oba dandak
 Saksa sakgni-
 Seng·oba wilwal,
 Dal·oba bewal
 Salsa salgni:
 Bu·sugrimo balasa
 Pulni bari pil·jawa,
 A·sesamni dokreksa
 Bilsi rikit baljawa.

2. Songsonganti gimik
 Rangkojaode bimik,
 Mikgaoatjaode-
 Man·ja chasong rikkit
 Gipatna a·gimik
 Bitchri jakepsade.
 Sakantian satjaode
 Buring a·chasopilgen,
 Salantian gamjaode
 Magnasa neng·aigen.

3. A·songna mopile,
Bikpile bawile,
Gisik nangjaskal;
Salanti sakanti
Maibako on·titi
Daksningjaskal.-
Saksa rasong chaariba
Ararana chagen:
Salsamangmang tangariba
Walon janggi galgen.

SIMSANG

1. Nokrek a·bri a·biding
Bisikoni gongdingding
Chima Simsang ta·dingding
Gonggeske ro·dingding-
Joka salni gipengchi
Songdu chirapakachi-
Darang a·rong a·sakchi
De·a-minga rasongchi.
2. Simsang chijolrangkosa
Gisik ra·a dikdiksa
Nikna gitik gitiksa
Mikjumango gitasa.
Saliramni ku·mango
Atam salni napango
Toka rongchi aramo
Ja·dil su·e chiningo.

3. Silang dare pattalrang,
Bisikoni chiringrang,
Mite tongte roramrang,
Chikol suripakarang-
Re-o salnik-janikja,
Salni ding-a nang sokja,
Chi-ripamchi ran-sokja,
Nirorona pa-sokja.
4. Mrik wari tu-arang,
Chirepani Nokaprang,
Cha-samkolni warirang,
Rangram rong-ma patalrang
Nion amang-gamangsa
Nikon riming-rimangsa
Mikjumango gitasa
Gisik ka-dangarisa.
5. Siju Do-bakkol ku-mang
Simsang rikam a-kuang,
Siriwilwil rong-kolrang
Napangode ka-suang.-
Songregipan nappakram,
Buga ranin jajokram,
Do-bak jiljal songdongram,
Na-bat mikdo dikdakram.
Kolning dringrang mitapa
Grimrang andalmitmata;
Chibol a-ning tangkama
Chi-indikdik kenmana.

6. Mingsinggipa Simsangchi
Chijol a·ning mitapchi,
A·ki gamchatgiparang,
Salnik-janikgijarang-
Chong·doari dongenga
Nana-nana dakenga-
Gisik a·ning bitgipa
Jawa matduatenga.
7. Simsang na·tok mingsinga
Chijolanti rim·ronga,
Na·rim-na·wak doronga
Jin·jok jin·jok roronga.
Simsang jolni A·chikrang
Chekpong doke rim·ronga,
Na·tok rim·rakgiparang
Walo na·wal nironga.
8. Antin' salo salode
Baghmara chijolde
Warekdimdim ninade
Bola-wa·a palade.
Ringko wa·chap dandakdak
Chirikamo rikrarak,
Rori wea jikjakjak
Mande soka wekwakwak.
9. Ringko chodochodoe,
Rori-malko chong·doe
Siju anti re·ronga
Chijolanti weronga-
Chikol dare jokako

Ta·ding chodoangari
Wari rilrakrikra
Ku·sim ka·dingangari.

10. Rompa-Rongdik chipecrang,
Dilsa a·bri ja·retrang,
Agrong Wari daparang,
Sapporiri an·chengrang,
Bandil bandil boldimrang,
Chio ring choarang
Na·tok wari bilarang,
Chikon gongding jokarang,
Nie rona nitoa,
Gingsiripang dodoa,
Nikmangmangon okkaa
An·senganin pekpila.
Simsang chijolrangkosa
Gisik ra·a dikdiksa,
Nikna gitik gitiksa
Mikjumango gitasa.

11. Tangka, sona gamsengrang,
Gun, mikkim, rasongrang;
Bipa, Chalang, matgrikrang,
Gisik wa·sagiparang –
Simsang chijol songdongram,
A·chik ‘songni mingsingram,
Chijol gittim A·chikni
Dingtang Patigipani.

12. Mingsing-minggamanirang,
Dongto·cha·toanirang,

Janggin katchaanirang,
 Biap nitoanirang -
 Nabagimin salrangna
 Ka·pak ka·pak nagenma ?
 Mikkang chasong salrangna
 Bate nabataigenma ?
 Simsang chijolrangoni
 Rasong jo·olanggenma ?
 Nama rasong A·chikni
 Da·o jaktuatgenma ?

Bol

1. Cheksi bijim bijak tangsim
 Nina tangsekgilgil,
 Ja·pang ka·sin simdim simdim
 Bolong, bolsal, bolsil.
 Basakoni bimik nae
 Bolma sokgalgaljok ?
 Badigita ja·dil su·e
 Kiro sike dal·jok ?

2. Basakoni rangkoenba
 Basakona tanggen,
 Badigita chasongrangko
 Aro nikangkugen ?
 Ama, apa, atchu, ambi
 Chasong gitcamrangko
 Ba·kujama uamangko
 Nang·ni pangma soko ?

3. Mande jatrangnaba skang
Nang·ko atchiama ?
A·gilsako bolni ja·pang
Ja·dil su·chengama ?
Karitangko dedagija
An·tangchin mesoka,
Changsamangba bitbatgija
A·sakna paraka.
4. Nitoriri bibal balan'
A·sakna chinani,
Chokchim chokchim bite nangan'
Janggina cha·ani
Bijak, bibal, kambe, rike
A·sakna ganani,
Ja·pang, cheksi, bibal, bite
Mandena on·ani.
5. Mingtasini sam-boloni
Pilak cha·anirang,
Rokomari jakkalan
Manden' dakgiminrang.
Tangka, sona, hira, mukta
Gamchatgiparangna,
Darangnaba na·an bata
A·gilsak dimdakna.
6. Manderangni janggi tanga
Aro gamchataba,
Tosusao sokna man·ja
Nang·ko indioba.

Dakgipan patijok ka·sae
Pilaknan a·sako,
Man·pachina jakgitele
Pilak nang·oniko.

7. Lekka sea, toka, nonga
Ang gita gokasa,
Indioba bolko daka
Dakgipa Isolsa.

AMA

1. Chongipa bi·sa ong·oba angara
Maina indita ka·sara amara ?
Bakgitchak odeko sok·kane aldua,
Ka·dingna changbao ka·bako dingdinga.
Angni tusio watgija nitima,
Tusia mikrako gipake ku·dima;
Okkrie grapo cha·aniko on·a,
Tengtoe sakinao tugija sana.
2. Detang bi·sako maina amara
Chonbemitingo indita ka·sara?
Rajako gitasa detangko dal·nika,
Sonana bateba gamchate nika.
A·sak gimikna batpile angna
Amani ka·sara amjawa tona.
3. Sakgipin bi·sani cha·ako nike -
Chi·a-toako on·pana sike,
Mikchi rakjawa ama na·ara
On·pana man·jae detangna ka·sara ?

Detangna indake na·asan ka·saama
Sakgipin amade nang·ko sokjama ?
Sakgipin dedrangni dal·ako nike
Dal·atna sikama detangko bate ?

4. Chonengo amani ka·sara indake
Mesokja maina dal·mano gamchate ?
Dal·ahaon gokani gısıkde ui·ja
Basako gamchatgen amana sigija.

KA·SAANI NOK

Cha·togipa song·arang,
Similgipa bibarang,
Rongchinggipa bimangrang,
Ka·dingsmitanirang,
Kusi gnang mikkangrang,
Ka·saani ku·rangrang,
Katchagipa gisikrang,
Rinokgipa bewalrang.

Rongtalgipa nokdringrang,
Bokbegipa ba·rarang,
Knatogipa sulrang,
Nitogipa barirang,
Manigipa bi·sarang.

Iarangan nokdango,
Ka·srokate gisikko,
Nokni plak ma·drangko,
Galchaatgen ka·sao.

BEWALTANG

1. Buring a·jangchiode
Ganggu susam engenga,
Walba seng·na skangde
Seng·na andalsikchenga.
2. Bijakrangni mojimosa
Balwakode nikgen,
Balwa tom·tom ong·taiosa
Do·drang katchae ring·gen.
3. Andalmikmik mikka sime
A·sakna chijingen,
Ja·manosa ronggrikbate
A·sak ring·rangchipgen.

CHIMONGMAN·O

1. Biterang mikchepa
Bol·rike bijimao,
Jeldapchong·mota
Akchimongmano.
2. Srange nikoba,
Bitchri satmano,
Bing·aia indiba
Ma·pangmae dal·o.

JAPINAPA

Similgipa bibalrang balpongangon
Janggi an·gimik biban gapa;
A·gilsak dikdik gipake ku·dimon
Balwan' bimangsa japinapa.

ANGA BI·SA

1. Anga bi·sa chonenga,
A1·babaming dongenga,
Cha·na siko cha·enga,
Rona siko roenga.
2. Ama apa ka·sara
Jeko man·e on·para,
Ukon chu·ongnikpara,
Cha·na man·on okkara.
3. Maiba nambatakode
Cha·enggenma saobade-
Chanchipaja ukode
Anga bi·san' gisikde.
4. Angni ama apana-
Dal·batama u'mangna-
Saoba gipin dimdakna,
Changja uko chanchina.
5. Ba·ra gital namako
Saoba bi·sa ganode,
Chanchiman·a gisiko
Ma·na sike ukode.

6. Dongja dal·a chonani,
Mikneng- mikbugrikani;
Gisikode bi·sani
Rorimaia salanti.

7. Ai an·tangni kattako
Manijaode gisepo,
Maina doka Ai angko
Ka·sagija detangko ?

8. Kal·grikgija dongnapja,
Aide uko nam·nikja
Porainade aratja
Gisikosa chinapja.

9. O, anga indide,
Aini ge·etakode
Katta ra·gen da·ode
Kal·grikchina watode.

RE·BA, PLAKAN RE·BA

1. Hai, hai, me·tra-pante
Re·ba nisan de·e
Okamchimongna gita;
Apsan ja·ku de·na,
Uni Songko rikna
Kristian sipairang gita.

Re·ba, p'·lakan re·ba,
Jakjinma jak-on·na;
Ka·na, kamko ka·na
Uni Songnokko rikna.

2. Hai, hai, me·aparang,
Imbo me·chikmarang-
An·ching re·mikkangana;
Miksang-nangrimgrike,
Un rasongna krenge,
Ka·sroke kam ka?na.
3. Dukrang bang·beoba
An·ching bilnengoba
Ka·dong' Uan dakchakgen;
Kriston' Rasongona
Kristian kotok jinma,
Hai, ka·dongaibo chegen

RASONG ON·NA SALSA

1. Bilsi sokon chingna changsa
P'·lak a·sa'· jatrangna,
Gisik katchan' kusiin' salba
Nabaa p'·lak mandena.
 An·sengan sal changsa,
 A·gilsak dukoba:
 Rasong on·nan' salsa,
 On·na changpajaoba.

2. Gisik ka·sin ka·tongjrimjrim
 Chanchiani baksa,
 Ka·asuang mikchi jingjang
 Ka·tong moa pil·sa;
 Chanchion ia salko,
 Jisun' atchianiko;
 Gisik jriman' baksa
 Nabaa katchan' salba.

3. Mande nama ringrang jingjang
 Rongtalgipa me·trao,
 Gisik Rongtalgipan' Seng·a
 Teng·suenba Uno;
 Jokatgipa Gitel
 Atchijok Ua me·trao,
 Mande pil·e re·bae
 Ia a·gilsako.

4. Biap man·jae danang Uko
 Tuatjok chikongo,
 Atchichakna nitogija
 Matchuni gisololo.
 Gitelrangni Gitel
 Duk chake mesokjok,
 Papirangni a·sel
 Sichakna atchijok.

5. Salgin' sa·gre aganprakjok
 Teng·sudape ringrang,
 Uko knae dil·dil ong·jok
 Mes·nirikgiparang.

Katchaani kattako,
Jisun' atchianiko,
Jokatna pilakko
Uni re-baaniko.

6. Sa·grerangba dipjrodipjro
Salgin' gitko ring·e,
Bildoangjok aramsako
Uko teng·sudape.
 Olakkijok Uko
 Katchinikgiparang,
 Pilak a·gilsako
 Seng·gipa rajarang.
7. Kangal cholgri, bi·sa ma·gri
Aro rajarangba,
Ka·tong katchae kusi ong·a
Da·alde u'mangba
 A·sak mojingjange
 Kusi ong·an baksa
 Katchan' ku·rang sale
 Rasong on·na salsa.

GALATBO DUKRANGKO **(KRISMASNI GIT)**

1. Jajrenga skimarang, a·sakni dukrang,
Aro gisik' bal·jrimarang;
Ka·tongni marangrang aro p'lak paprang-
Galatbo u'rangko na'mang.

Galatbo p'lak nang' dukrangko
Pap marang namgijarangko;
Jokatna an·chingko p'lak papirangko
Atchijok Ua a·gilsako.

2. A·gilsak sripachim papni sagalo,
Janggirang andalaosachim;
Papni beri gnanng sitengtoachim,
Dongjachim janggi jokan chol.
Aiao maikai nambea chol!
Aiao maikai katchaan' katta-
Janggiko jokatna amgipa saksa
Atchiaha Jisu Bi·sa.

3. A·gilsako seng·a janggina naaha,
Man·jachim jekon pilakba;
Siani beriko dakgrike amaha,
An·chitangko on·chakenba.
A·gilsako seng·a naaha-
Seng·atna p'lak janggirangko:
Ka·dimean do·ga p'laknan oaha,
Hai, rasong on·na ia salo.

4. Dal·nikbo ia salko Un' atchianiko,
Ka·donge jokpana uchi;
Gale p'lak dukrangko Uni jakpongo
Ja·rikna Uko ja·manchi.
Hai, katchapana an·chingba,
Apsan gisik ka·dimena;
Dal·nike manina, rasongko on·na,
An·chingni Jokatgipana.

AN·CHING MITELNA

(Krismas)

Bilsi gimik tangana an·ching mitelna,
Man·jok an·ching ia salko changsa niktaina.
Katchatokna pilakan an·ching ia salo,
Cha·e ringe an·sengna an·ching da·alo;

1. A·sak mojingjangpɪc kusi ong'engo,
Gɪsik katchae ring'pana an·ching Krismas-o.
2. Dal·a chona pilaknan a·sak gimiko,
Mɪksongani mingsasan Jisun' atchiao.
3. Gɪsik katchae manina an·ching ia salko,
Salsamangmang guale a·sak dukrangko.
4. Jokatgipa an·ching atchian salo
Ka·sagrike manina an·ching Krismas-ko.
5. Dongpajaoba an·chingo gamseng on·pana,
Katchae ku·rang mitele rasongko on·na.

ON·ATENGA SALAMKO

1. Chanchiman·a saksano,
Donggenoba chel·beao
Ian baksa ka·sao
On·atenga salamko;
Dal·nikchina gisiko
Ia salsamangmangko.

2. Krismas nang·na namchina;
 Nokni ma·drang gimikna,
 Patiani ong·china ;
 Rasong Jokatgipana,
 A·gimikchi ring·china,
 Pilak manden' jatrangna
 Sian' beri chotchina.

ROBO ANSENGE SONGTANGO

1. Robo songtango, na·mang noktango,
 Katchae pangnan ka·tongtangtango;
 Ka·sagrikachi, bebe-dakachi,
 An·sengbo ma·drang noktangtango
 (Ring·taitaiani)
 Robo an·senge, na·mang songtango,
 Na·mang dukrangko ka·guale;
 Man·taijawaha a·gilsakode
 Na·mang noktango gitakode.
2. Nokni p'lak madrang, dal·a·chonarang,
 Ka·sagrikna skibo na·simang;
 Nok an·sengbatgen ka·saa dongode
 Nagen katchaani janggin' salrang'.
3. Bakrima ripeng , noksul-songsulrang-
 Jongada ma·drang gita u'mang;
 O, mikaochimbo, manden' gisikrang,
 An·seng-baljokna p'lak A·chikrang.

4. An·senga a·song rona an·chingni;
Mingnama bimung knatoani,
Ong·genma a·songna nitoani
Dongjaode kamrang ka·saani?

- 5 Robo noktango, ma·drang an·senge,
Nok·namangchina sakantichi,
Robo songtango, pilakan katchae
Song an·sengchina na·simangchi.

A·CHIKRANGNA

1. A·chikni Ripeng, A·chikni Ripeng,
A·chikrangko okamkubo,
Ong·angkubo chasongna ripeng
Nang·ko rikna skikubo.

2. Ma·brangrikjok bano Pringprang
Andalenga teng·suatbo;
A·chikrangna changsamangmang
Askı gita nabataibo.

3. Da·nang Seng·baa najokchim changsa,
Seng·atna A·chik a·song-
Nabataikubo pringprang baksa
Chasongna seng·an rasong.

4. Chibisıkba ran·changama ?
Ka·singipa a·brin' chimik -
A·chikrangna joktaigenma
Sapporiri a·song gimik ?

5. Tangbang' A·chikna Ui·ani-
 Pangma gita bite nangbo;
 A chikrangna mesokani
 A·gimikna gipe satbo.
6. A·chik Ku·rang, A·chik Ku·rang,
 Ku·tipgija mikotaibo;
 Ring·rakjaoba nang·ni bimang
 Ka·sirokrok ring·angtaibo.
7. Ring·ravgipa ong·bo na·a
 Gitok ran·changpile,
 Gapkamaebo ku·rangrara
 An·tang suakpile.
8. Ring·ang' ku·rang bikbopile
 A·chikna pangnajol,
 Ku·rangtangmung nikjapile
 Aram gisep joljol.

SAKANTIAN A·CHIK JATNA

1. Chakat' A·chik me·a-me·chik !
 Janggi grima il·lengtokbo;
 Miksontokbo pilak A·chik
 Gisik grima chanchitokbo.
 A·chik gimik sakantina,
 Sakantian A·chik jatna.
2. Chakat' Simsang bisikoni,
 Manda, Damring chijolrangba-
 Nokrek a·bri paksaoni
 Songdusamni A·chikrangba

An·pilbabo ku·mongrime,
Maibakode dakatpabo,
Gisik sokja inainabe
Tusiaoni simakbabo:-
A·chik gimik sakantina,
Sakantian A·chik jatna.

3. Chakat' bakbak, chakat' bakbak
Tusigipa jagipukal,
Okamenga mik kang ajak
Jachanggipa kratcha·kal.
A·chik gimik sakantina,
Sakantian A·chik jatna.
Mikgittalo ku·chakjaode
Jajumangchi jagokchina
Mandeska chakatjaode
Me·mangrangsa ku·chakchina:
A·chik gimik sakantina,
Sakantian A·chik jatna.

4. Nangol gongdang rim·gipaoni
Dal·a kamko ka·gipaona-
Kamtangtangchi an·tangtangni
Rikbo namgniko jatna.
A·chik gimik sakantina,
Sakantian A·chik jatna.

5. Nokni me·a-me·chik damsan
Detangtangni namgnina;
A·chik gimik ong·bo saksan
A·chik jatko dal·e rikna.
A·chik gisik sakantina,
Sakantian A·chik jatna.

6. Gisik nange nachil songbo
 Okamako chinapgipa ;
 Nama kamna miksongrimbo
 A·chik gisik seng·kalgipa.
 A·chik gimik sakantina,
 Sakantian A·chik jatna.

7. A·chik a·song gimik chipe
 Mingnamako bitchri satbo,
 Noksan gita ka·sagrike
 A·chik songko nokdang rikbo.
 A·chik gimik sakantina,
 Sakantian A·chik jatna.

8. Chakatbojok, chakatbojok,
 Chakchikanı chu·ongaha;
 A·chik ku·rang delpilengjok
 Knadike chakatboha.
 Sakantian an·tangtangko
 Changsamangmang de·mesabo.

9. Buringgrimo okamoba
 Rong·kuchaksomanpilgnok,
 Ahao ku·rang jripahaoba
 Balwao bingbangrikpilgnok.
 Sakantian an·tangtangna
 Ku·chakboda A·chik jatna.

10. Chakat' A·chik pante –metra,
 Simildingding balgaotokbo;
 A·chik mukut mingna krakra
 A·chik gunko balpongatbo.

Pilak A·chik pante-metra,
Mikasalbo gisikrara.

11. Bibalrangko dima gita
Sa·gre-mite watnapjakal,
Teng·sugipa aski gita
A·chik 'songko nidoatkal.-
A·chik a·song rasongona,
Chasong rikit tangbangchina.

NITOGIPA 'SONG

1. Aiao, maikai an·senga A·chik 'song!
Chanchiaton gisikchi ka·srisri-
Aiao, da·nang nina nitoriri,
Aram pa·chap 'sakchi rikgipa 'song.
2. Aiao, maikai nitogipa 'songsa!
'Bri kosako chagipa sam·bolrang,
Aiao, damsa bari gita u'rang,
Mikchi nikon ka·paka gisikchi.
3. Nitoriri bibalrangni bala,
Ka·srokat chiringni gam·arang:
Knatoriri ring·a do·ni ku·rang.
Gisik katchan' dukrangko guala.
4. Aiao, ka·sri aram pa·chap balsri!
'Bri kosako an·senga pang·sangsang:
Rona nama gingsi ripang ripang,
Aram pa·chap 'bri kosak balsrisri.

5. Chonbeoba da nang chingni a·song,
Rimitchipchip nitoan' teng·suchong-
Seng·atchina pilak a·bri-a·kong,
Ching' A·chik 'song ong·china ching' rasong.
Aiao, nambea! Aiao nitoa! Aiao an·senga!
'Brirang' 'sako rikgimin A·chik 'song!

CHING' A·CHIK A·SONG

1. Ching' A·chik A·song ong·chong ching' rasong –
Gipgen nang' bimung pilak a·bri a·kong;
Ring·gen p'lak do·drang, p'lak jatni dedrang,
P'lak 'brirangna knatori ku·rang.
Dongkugen chiring bolgrim jringjrotna,
Tipchanggija janggin' chimik chingna;
Ching' A·chik A·song ong·chong ching' rasong
Pangnajol ching' song teng·supachong.
2. Dilbo seng·ao chingni gisik bilko,
Pattibo ching' a·sak p'lak gisikko;
Mingatna nang' 'brin' rasong mikkimko
Chuatna ching' a·song chigako.
Krenga ching' dambe nang·ko de·atna,
Miksongani songtangko silatna;
On·bo ringna tipchanggija chimik,
Krengna 'songtangna ching' jat gimik.

3. Songdu 'kawe sagal rikamoni
Nikatgen seng·ako brin' sakoni-
Sikpachong changsao ong·pana apsan
Ong·pachong ching' song ge·sa nisan.
Hai, chakat' A·chik pante-me·trarang,
Gisik gital rikna p'lak damberang;
Man·kamjaskal ching' nama bimungko
Hai, krengna chuatna songtangko.

O, ANG' A·CHIK A·SONG

1. O, A'chik A·song,
Ka·sara ang' ka·tong,
Gamchatbea jatni rasong;
Jokgen nang·na mikchi
Chanchie gisikchi
Ama songna ang' ka·saachi.
2. Atchu ambin' roram
Ma·pagitcham siram,
Bipa matgrik panten grikram;
Ma·gitchamni bimik
A·chik dedrang gimik
Tipchangjachong ching' ka·san chimik.
3. Tangseka a·brirang,
Ka·sina chiringrang,
Slang dare rong·magrimrang;
Do·chelu do·kua
Ka·suang mikoa,
Matchok me·samrang chasong roa.

4. Donggenma banoba
A·kitik wenoba,
Nang·na bate nambatgipa;
Darang gipin a·song
Batgenoba rasong –
Chipgenma jringjrot ka·san' ka·tong?
5. Ong·china mikasal
Burungni do·mesal –
A·chik songni gunni bibal;
Nang·na ka·san gisik
Tipchanggiija chimik
Jokang' ching' A·chik a·song gımık.
6. O, ang' A·chik A·song,
Teng·suchina chasong chasong:
Bimung mingsingatna
A·song balgaoatna
On·bo ching' Balbra pangnajolna.

NANG·NA A·CHIK A·SONG

1. Da·nang angnade –
A·songtango roani salde,
Ka·pak ka·pak chanchiatode,
Man·jawake gualnade
Atchıramtangkode.
Silpajaoba a·song
Biap a·bri a·kong,
Ong·kugenma chasong chasong

Nang·na nama rasong?
Ka·galama angni ka·tong
Nang·na A·chik A·song?

2. Basakobasa –
An·sengriri roan salosa,
Gamchatama angna dikdiksa,
Nang'rasongna mikbrapesa
Kratcha·genma pil·sa?
'Brirang ringrang ringrang
K'natori ku·rangrang,
Nitoriri sam·bibalrang
Grikbea chiringrang.
Atchiram songni ang' 'brirang
Janggin' ringanirang.

3. Atam balsrisri-
Sal napangon nina nitori,
Baritango saksan roari
Ka·sinjrimjrim ka·sariri
Gisik chanchiari.
'Brirang bo·rot-bo·tot
Nina nitochongmot-
Niwataton ka·srok ka·srok
Da·nang an·sengbejok
Gisik chanchi ka·pakchongmot
Mikchi tingtot tingtot.

4. Gose angde-
Man·kugenma nang' gitakode,
Silpajaoba songtang gitade,
Dongkugenma banobade

Ui·ja angade.
Diksiksamangmango
Chanchia gisiko,
Ka·san ang' ku·rang jumango
Jagringsa songtango.
Mera gisiksa aramo
Ma·pile basako?

CHINGNI DONGRAM

1. Dongtoa, Dongtoa, Dongtoa ching' brio-
Balwa pang·sang balsri balsri rong·ma patalo.
Samrang bolrang nitoa, a·bri a·ding rotoa,
Jawa songni a·gittalrang da·nang matdua.
Chingni dongram A·chik a·bri a·song balnama.
2. K'natoa, K'natoa, K'natoa ku·rangrang –
Do·ni ring·a chiring ga·ma katchaanirang.
Dongja chingna a·sako k'natobata sulrango,
Gaantin' ku·rang, do·ni gitrang burung bolgrimo;
Chingni dongram A·chik a·song katchan' ku·rango
3. A·brio, a·brio, a·brio ching' dedrang –
Rong·ma rikkim silang bolgrim chingni
neng·takram.
Cha·gen ta·ma e·chingko, gal·da baring jal·likko,
Ta·ja ta·ring, rae·a wa·ring burunganiko.
Chingni dongram A·chik a·song chingni
neng·takram.

4. Nitoa, nitoa, nitoa ching' 'brirang –
Rona nama an·sengbea rong·mapatalrang,
Nitogipa bibalrang, tangsekgipa a·barang,
Rona nama nitwattoa balwa pang·sangsang.
Chingni dongram A·chik a·song chingni an·sengram.

A·CHIK A·BRI

1. A·chik a·bri nitoriri –
Nina gitik ka·sri ka·sri,
Aram kimit balwa balmik
Salguri salmik.
A·chik a·bri nitoriri
Aram chapchap balwa balsri.
2. A·biding chu·chan chu·chan,
'Bri kimbe pen·pan;
Bol rike pichap pichap
Tangsim rikrak –
Aiao da·nang 'brirang apsan
Niwato pang·sang.
3. A·chik a·bri nio tapsri,
Nina gitik ka·sri ka·sri;
Ja·ret ondime gongge gongding
'Brirang da·nang.
A·chik a·bri nitoriri
Nitobata nio ta·sri.

4. A·breng a·dalrangba
Peng·pat suet,
Kosak ka·ma sambeng
Gitching ruet,
Nigamaton ka·sariri
A·galmak kari.

5. Aiao da·nang ka·sri ka·sri
Niwataton chel·aoni:
Aram pa·chap simdim rikrak
'Brirang mitap.
A·chik 'brirang nitoriri
Gisik ra·gen ka.sariri.

SONG CHEL·AO

1. Assam a·song' saliramchi
Dongpa·a a·brin' jat songsa;
Chonbeoba a·song chingni
Songdongram ching' ma·pagitchamni.

A·chik song,
Gamchatbea atchiram song;
Nang·na ong·chong nama rasong,
Silpajaoba ching' A·chik a·song.

2. Chanchiaton ka·sri ka·sri
A·chik 'briko nitoriri,
Nikatman·a ang' chel·achi
Atchiramko anga gisikchi.

3. Ka·saa angni ma·parangko
Ang' jong-norangni ku·rangko;
Knagenma songgipino
Re·ange A·chik songni chel·ao?

4. Gamchatanirang a·sakna
Dognuenga gita na·a,
Tusienga burunggrimo
Mikrakgen miksele basako?

KU·RANGTANGCHI

1. O, Chingni pagitchamrang,
Ring·na skipabo.
Knachina A·chik dedrang
Nang·ni ring·a sulko.

2. Miko' chiring bisikoni,
Chiring joka gita;
Seng·at A·chik gisikoni
Wal·tot nata gita.

3. Buring grimo do·ni ku·rang,
Knatoa gita,
Mejekpana damben' sulrang
Ring·sningna gita.

4. A·bri, chiring, burung, bolgrim
Batjava singhason;
Jeon ong·gen chingni mikkim,
Ching' chongipa a·songon.

5. Re·ba, re·ba, re·mikkangba,
Pilak A·chik dambe;
Similgipa chachat ganda
Ong·bo me·tra·pante.

6. Ringbo chiring chijanggiko
Panterang me·trarang,
Ringsik seng·an ku·bibako
Pilak A·chik dedrang.

OKAMENGA PILAKKO

1. Gisik sikan' suakesa
Chengatenga ku·rangko;
Chro·chro ring·rimnasa
Okamenga pilakko.

2. Ku·tangko tangbangatna,
Ku·rangko gam·sokatna
Ku·onninggrikanichi,
Pilak A·chik mandeba
Jatna ka·saan' gisikchi
Pante·me·tra pilakba:-

3. Wal·ang riprapattokbo,
Bil·cham so·dikkatpabo
A·chik sea·jotachi,
Segiminko ra·achi.
Pilak A·chik mandeko
Mol·molenga ka·saachi.

DUKRANGKO AMTOKE

1. A·gilsak janggi-tangao dukrangchi sinchepon,
Ka·sara, namnika, kusin' ka·sine dimelon
Ripeng, bakrima, ma·drang janggile chel·angon
Gisikni-mikandal duko
Dongna nangaha,
Sikdikdik ku·boso saksan
Denggoke dongaha.
2. Gisikni bal-jrimarang pilakchin su·pekjok,
Matgitcham dukni parirang tengtoe sabajok,
Rasong grin-janggini salrang indaken re·angjok
Simgipa aramrang gita
U'rang duulaha,
Waljatchin' wal gita
Namen andalaha.
3. Ripengrang namgipa angni da·o dongjaha?
Gisikni seng·anirang andaljripaha,
Ka·saan' ku·rangrang srikritikaha.
Chipakkore pokpekon
Duko dubiaha,
Dukni sagalon
Janggi sripaha.
4. O, ang' ka·saarang maina gala angko?
Nikoba niggija dake angni dukni salo,
Dongja ka·dimeatna pilakba angko da·o.
Rasong grin' wario
Nom·boke balbona,
Atchijok a·gilsak duko
Mikchio dubina.

5. Oh, a·gilsak angni nang·ni mikkang bao?
 Oh, mande-jatrang nangni ka·saa sao?
 Oh, Nokgipa Na·an parakgenma da·o?
 Parakbo ang' gisiko
 Ang' dukni a·selko,
 Ong·jaode balko
 Balponge talatbo.

6. Parakjok angna gisikni jagringo,
 Ang' gita rasong gri bang·bea denggokengako:
 Rasongni Songona janggirang simakengako-
 Neng·takna jringjrotna
 Rasongchi teng·sue,
 Ring·pana, ka·srokna
 Dukrangko amtoke.

JAGRING TENG SURIKGEN

1. Jagring mikkim niktaikuna
 Am·genoba a·kitikna,
 Man·jawaha chasongrangna
 An·tangtango andalana.

2. Mukut, rasong, singhasonko,
 De·a·minga a·gilsako -
 Changa-sapa, lekka-pora
 Manden' jatna chuarara.

3. Tangka, sona, hira, mukta,
 A·gilsakko ka·pakata;
 Bi·sarangni gisik gita -
 Manderangko mikbokata.

4. Bebe aro ka·saani –
A·gilsako teng.suani,
Tochri gnang chaki gita
Andalako seng·atani.

PATTIGIMIN RASONG

1. Rasong janggi sikrime bimang a·mang nangjaha.
Maha maha songdime jakma neng·na nangjaha;
Salarikit kusini sukni sagal tipjaha,
Walarikit roani sukni jumang pil·aha.
2. Rasong balwa nangana rasong mukut pil·aha;
A·sak suknirarachi be·en gimikko pinaha.
Chasong janggi tangani indioba batangjok,
Pilak kusin' balwarang dimu gita balangjok.
3. Man·jok nitoaniko a·rang a·dang janggina;
Chinjok ba·ra bokako songsonganti niksengna.
Cha·e·ringe a·sako sukni be·en pilaha,
An·gisikna dingchike mikkim chi·rongbalaha.
4. Rasong a·mik patana rongsim-rongsikbataha,
Nio mikchikimana songsonganti jangaha.
Mandeska de·ana ku·ba·gisik tang·aha,
Chicha bokbaka gita rasong a·sal pilaha.
5. Indioba rasongsa, bimik-cheksi najawa,
Bibal chokchim a·sakna bilsu rikit baljawa;
Gitni ku·rang boldimo indinari gam·jawa
Rongchinggipa sal·ja·dil saljatchina su·jawa.

6. Patigimin bimik rasongni salna sikrepge,
Mingsinggipa gunrang balwao balpongantokgen;
Do-gisika paksachipak rasong gital nagen,
Rasong baksa ka-saanisa chasongna simlilgen.

RITIMKARI

1. Mia-misi chabaengjok mikka chijimana,
Sara- samsi ritimjok- tangsekgilgil nina.
Sakchi aram mitapna riprap riprap delipe,
Wajok wachi gitalna mikka- balwa ta-rake.
2. Ding-karini balwana aram simchirikaha,
Sam-bol tangsekgilgilna wachi gital sokaha;
An-bigilna an-gipe chinjok tangsekgilgilko,
Ringrang ringrang ching-chipe teng-suchakjok
a-sako.
3. Attam wal-kumikjajok a-galmakkari gita,
Dimu rippang baljajok songdu an-cheng kitgipa.
Wal-na-china kenjaha, samcheng-agal chijimjok:
Mikkang me-te satjaha; sara-rona rotojok.
4. Mandal bibal gitchakbal bale
balchamangmanjok,
Chi-rengriprip jakgital jakritime bijimjok;
Sara wal-tim sikramo samsi namittotbajok,
Sambangguri kamtongo ringsonggital ritimjok;

5. A·sesamni sinaru rimitchipchip balbaengjok,
Noksamoni akkaru wa·gong wegatbaengjok.
Chikoramoni bolchu jakritime bijimjok,
Saraoni te·gatchu bite rongrongtebajok.
6. Boldim ringsonggitalo do·bret bitip ra·aha,
Chiring rong·ma patalo gan·drak gakgakbaaha,
Beng·blokrang ong·katjok a·paljolni chibolo
Bitchi chi·na rerajok atam wala simsimo.
7. A·sesamni bolgongo bokdim ong·jok wa·gambal,
A·ba wa·pang kamtongo mittotbajok me·awal:
Attam wala simsimo do·burungrang jikjakjok,
Tuna bolgrim bijimao siksik-saksak sandijok.
8. Sangkra bandil bandiljok burung bolgrim gisepo,
Arobakrang ritimjok kamtongspa bipango,
Ta·ja-narotgonggriting bolgong-wa·gong weaha,
Ru·at- agal gol·ikeng a·sesamo malaha.
9. Attam a·ba re·bao me·awalko subajok,
Buring-rona napsiko songrurako akbajok;
Me·chik-nomil desarang arobakko am·bajok,
A·daloni gal·darang kape cha·na nambajok.
10. Ringna gitik chijimjim jokenggipa chiringrang,
Ding·karina ka·sinjrim an·senggipa balwarang ;
Nitoani a·sako changsa balgaotaiaha,
Pilak ong·atgimino dimelani dongjaha.
11. A·gimikna boljanggi ringsong- chagattaiaha,
Jabilsina rongjanggi rongchri- rongkotaiaha:
Pattiani dinbajok ong·atgimim gimiko,
Nangdapani dongjajok manderangna a·sako.

12. A·ba-bolgrim burungrang aganprakenga gita-
Do·o- matni kurangrang rasong on·enga gita,
A·song balnang balsiri mande sakna balnama,
Gisik mangmang ka·siri dukni salo guala.
13. Dandak-dandak chong·doe a·sal sakna danbajok,
Rajan' nokna batpile gamseng mitap jin·bajok;
Indioba sari·gri mikgil mitapsnichi
Simakjawa niari mikchipenga gisikchi.
14. Gose da·nang indiba rongjanggide ran·aha,
Bilsu-kari sokoba indin ong·gramaiaha.
Nitogipa bario teng·suani dimeljok,
A·sal dandak chong·ao a·song cha·asibajok.
15. Songo cha·asimiting da·nang game- cha·gipa,
Ta·buringo tangmiting cha·na migirigipa.
Bi·sa-desa ram·miting gimin cha·na alsokjae,
Gamgipa bil·be·miting okna a·ba-re·ange.
16. Atam a·basokbao ta·buringko ritgope,
Cha·arijok noktango bi·sa-desa okgape.
Samjak-me·su ritako okgapatna cha·an
Okchiripet dakako nikjok bi·sa-desani.
17. Mia-merong rongsaba rongjanggiko sikjajok,
An·gil ching·kalgipaba dengdobikbik dakaijok;
Ja·a jakgolangsijok bi·sa oktongsisirang,
Greng-guasu nagaljok bilgilari ba·rangrang.
18. Te·brong bite rongrongte nike ku·chi minoka,
Ku·chi mittap nitate ake cha·e nimana.
Tokchang-tokchang samtangtang songna dukni
sokbajok,
Da·nang saoba- saobarang wal·ko-chikon sikjajok.

19. **A·ki-a·sal jimgijao samsi chagija gita,
An·gil daknanggipako kini rokgimin gita:
Bimang manggisi gita bibal bari jatchio,
Gangma minenga gita mikkang sona bibalo.**

20. **Pattigimin mandena rippingchina nimakon,
Mite- Misi-Saljongna Kamal wachi tatjakon;
A·songari wangdate cha·gipachi pakmakon,
Chasong rik. : wa·rame gisik do·tekmeakon.**

21. **Pattigimin rasongko mande a·nangatjokma'
A·song-kosi gimiko marang jo·oldapjokma?
Ong·atgimin rasongna ringrang mesokanima?
Ringrang Ritimkarina mande kiratcha·jama?**

EKANGANI

1. **Janggin' salrang mikjapsa kimit mikimitaha,
Andalsimsim a·sakna salsa salnaptaiaha;
Mikgil mikjapjawaha, mangkra ba·e bikapsa,
Sikjaoba watnajok ka·saarangko dikdiksa.**

2. **A·gilsakko cheaha-pilak a·sak dukrangko-
Silchidare nangjaha bate re·na Jordanko;
A·sak muni marangko sippodape galbajok,
Sia-saani bojako sia aktetgalbajok.**

3. **Baljanggisa arara balpongangjok rang·gitik,
Ka·beoba ka·tongo chipjawaha an·gimik:
A·gilsakni bikkapko sia beri delaha,
Janggi silchi neng·takna be·en a·mang pil·naha.**

4. Angna mikchi ong·nabe angni pilak ripengrang,
Bika a·dram be·nabe ang' no·ama, jik·dedrang;
Mikchi be·en pil·jawa, mikchi waring jokoba,
Dukni sagal tipjawa sinti do·pilgimoba.
5. Patat' bibal gipokko angni mangkra gitoko,
Galat' chokchim balsako on·e ka·saan salamko;
Watat' gisik mitapchi bi·chakani kemako,
Nichaoenba u·site kalimani mikchiko.
6. Ang' bak·ripeng sanaba groni sildeng ungoba.
Kema bi·a watchina bimang manggisioba:
Ka·saarangni grorangko donggenoba hanoba,
Chottomatjok sildengko mikjap·mikjap bi·enba.
7. Janggi tangan' salrango pattia'ko man bejok,
Pattigimin salrangko arang·a·dang bon atjok;
Indioba ring·kugen de·mittele rasongko-
Siangoba janggi·sıl Chinalsako batango.
8. Dukni sildeng bachijok·angko ja·kintekgipa,
Sian' beri baosajok·angko delgittanggipa?
Balwa gita sipjokma dukni chipakkorerang,
A·ning mitap napjokma sabisini jo·ongrang'.
9. A·kol wang·a gitalo be·en a·mang pil·najok,
A·an bimang gitcamko misil misil galangjok;
Indioba cham·jawa janggi gisik silchide,
Gronggriktaigen arimo basakoba changsade.
10. Ka·sabea ang'dedrang, angko gisik ra·nade,
Krengbebo na·simang ka·saan bilchi chenade-
Na·a jeko man·para on·bo ukon ka·saana,
Jeon kamrang ka·sara teng·gen na·mang janggina.

11. **Gisik-bilko** galnabe wakni mikkango gita,
Miksongako watnabe janggi chiripa gita;
Gane beben' mukutko bu-sugrimko re-oba,
Janggitangni salrangko pattiani chanenba.
12. **Pringo do-gisikjoko** nama kamo susana,
Atam wala suna mo rasong on e nengtakna
Mingbo nangni kamrangko mingantiko chandime
A-sak re-a matchoto kat'chae janggi neng-takna
13. **Atam salni** napango bibai sikrepa gita,
Marang guang binangko sia ma-ekgikati
Chipgen unon rediba sunlam dongripa.
Manden' Janggi -silehna biba simla gita.
14. **Jekai bijak** mojumo balwa balsiriana.
Jakrimta bijakrang nanggen unon ga akna,
Dring gitcham ga-ake soruronggen a-mango,
Kariona dandake a-sal pil na ja-pango
15. **Chirang sipe** chadogen biba pil-e atamo,
Indakesa su-sranggen pilak ong-atgiminko-
Unon janggi siktaegen. pilak janggi a-sako,
Chibimani chirangba nangdintaigen sagalo.
16. **Maiko** aganangkugen, angni ku-rang najajok,
Nasimangde nikjaenggen angko rimna re najok;
Nitogipa teng-suan rasong ringrang-ringrangjok
A-gilsakni bikapko gale gansicangmanjok
17. **A-mangoni** bibalchi angko salam ka-rikbo,
Angni sko donachi ka-saan' holko ge-rikbo
Manggisini mikkangchi salam ka-e sakprakko,
Watangnajok 'songtangchi ka-pakoba na-mangko.

18. Bakdrang, ripeng, jik-dedrang, re·najokne angade,
Ka·sagrikbo a·sako angko gisik ra·nade;
A·gilsako ong·jaoba an·ching janggi·silchide,
Gronggrikaigen arimo basakoba changsade.

KARITANGNA BILSI SOKON

1. Bilsisokon an·seng an·seng,
Songnok bari chi·jeng·chi·jeng;
Attam pringo sin·jrim sin·jrim
Guuri pang·sang 'brirang simdim.

Sakchi rikrak-rikrak tangsim-
Suurin' aram bokdim bokdim,
Salni jagring re·a gongding
Teng·suange ka·sin ka·sin.

2. Sara samsi bandil-bandil,
Nitoriritangsekgilgil,
Songni rama-sorok ta·ding
Balwa ringna balbring-balbring.

Pul-bibalrang boksogimgim-
Barirango rimitinchin
Bala me·gong bibal bokdim
Ka·ritangna il·gim-il·gim.

3. Bils sokon an·seng an·seng
Songnok bari chijeng chijeng,
Attam pringo sin·jrim sin·jrim,
Guuri pangsang 'brirang simdim.

Mesariba rimitchinchin,
Balwabalmrik ka·sin ka·sin,
Biba pa·ang silmildingding
Ge·a patal ramadingding.

4. Bilsi sokon katchatoka,
Bi·sa·desa an·sengtoka-
Atam pringo jipjang-jipjang
Jikjak-jikjak katchan' ku·rang.

Balbring balbring an·sengriri,
Ku·rang sale ka·sri ka·sri;
Me·tra- pante riprang-riprang
Gane·chine illip·ildang.

5. Bilsisokon an·seng an·seng
Gisikrangba balbojengjeng,
Dal·a- chona ta·kreng-ta·kreng
Ja·ku de·an ritcheng ritcheng.

Songo- noko kimko kimko,
Katchan' kurang bikbo bikbo
Song an·sengan aman' 'songo
Karitangna bilsi soko.

GOKAREK-GOK

1. Songo-noko dongari rona inoba,
Songtang an·sengpajanan gong·ja indiba:
Samtangtangchin burung bolgrim balwa ringnaba,
Mitip-mitap, so·so·jengjeng sara·ronaba.
Gokarek-gok, gokarek-gok,
Do·gisikjok songtango Gokarek-gok.

2. Game-sue cha·ari dongna inoba,
 Songtang an·sengpajanan gong·ja unoba:
 Bikipil-bawil chanchiman·a da·nang ukoba,
 Bilding-bildang, jaja-jiji dake gisikba.
 Gokarek-gok, gokarek-gok.
 Songna do·gisikengjok, Gokarek-gok.

3. Dongramtangko watnapja rogimalenba,
 Wate re·na ka·paka songrenikjaenba;
 Chigatangna, nokaptangna song-nok siljaoba
 Changsa pil·sa chanchiman·a da·nang ukoba.
 Gokarek-gok, gokarek-gok,
 Do·gisikon ka·paka Gokarek-gok.

4. Gisep-gisep an·sengani songo-nokoba,
 Chrok-measae, cha·e-ringe song an·sengjaoba;
 Basakoba katchan' sa·rang a·songtangoba
 'Song gipino man·na amja jeko indiba.
 Gokarek-gok, gokarek-gok.
 A·chik songna gisikjok, Gokarek-gok.

5. Gisikode a·songtangko man·ja gualna,
 Song-nok gittim bari bolgrim an·sengpajaoba;
 Dong'nok gisik sikdikdike a·songtangoba,
 Jeba ong·bo songtangkode sokja pilakba.
 Gokarek-gok, gokarekgok,
 Seng·na do·gisikengjok, Gokarek-gok.

GACHIOBA AN·SENGA

1. Jik·kimoba man·dik·man·si dakbea,
A·ko game bilba neng·na nangbea,
Oe mai, bebe mai,
Panteosa jechi jachi ronaba,
Nangarangna re·paoba inbea
Aganpaoba jegriknasa botaia,
Oemai, bebemai, man·dik·mansı.
2. Bi·sa ba·rik·rodilnaba man·dika,
Bi·sa grapon mumunaba changpaja,
Oemai, bebemai;
Setangkosa rodilchina inaia,
Desatangko malmoknaba sappaja,
Basak‘bade grapsrangnasa sikaia.
Oemai, bebemai, man·dik·mansı.
3. Bi·sa ba·rik·rodiljaoba namjawa.
Bi·sa gnang mi·bijakkon song·jawa;
Oemai, bebemai,
Basakoba song·paoba minatja,
Simsakgija song·arigen mikoba,
Aganpaoba ku·keng·wakeng inaia.
Oemai, bebemai, man·dik·mansı.
4. Attam·pringo roamoba mangnenga,
Bachi maina re·angaha insoa,
Oemai, bebemai,
Noktangoba so·sojengjeng ka·soa,
Noko rooba watna·chengna changpaja,
Roramoba bate·bate arata.
Oemai, bebemai, man·dik·mansı.

5. *Jeba ong·bo gachi ong·e dongnajok,*
Nomilrang ba me·apajok inajok,
 Oemai, bebemai
 Bi·sarangba ‘Baba’ ine okamjok,
 Manderangba ‘Ang Jong-pa’ ‘nedemingjok,
 Gachioba gisepode an·sengjok.
 Oemai, bebemai, an·sengnikjok.

DONGODE ANG·BAKSA

1. Rong·ma pattalo dongode ang’ baksa
 Ki·tap kingsa, ringani lausa, mi palsa
 Aro ka·dimeatna saoba saks-
 Ong·genchimma suknirarasa?
2. Chubatsranggipa a·brini pattalo,
 Ka·sina balwana bijakrang jimjeo,
 Chubate chanchina angna on·bo-
 Dikdiksa guale a·gilsak nang·ko.

DONGODE UN·BAKSA

Poraina namgipa ki·tap,
 Rona nama badiaba biap,
 Knatogipa gitni sul,
 Similgipa bibani pul,
 Nama-nama cha·ani,
 Aro noksa-salani,

Dongode un` baksa
Hobani chatchi saksa,
Anga jechaknapjawa,
Janggi sina sikjawa –
Iarang angni nanga chu-gimik,
Batjawa angna a-gilsak gimik.

REBA P'LAK NOMIL – PANTERANG

1. Re·ba p'lak nomil - panterang, nomil – panterang,
Ka·srok ka·srok katta – ring·at', katta·ring·at';
Damsan damsan ku·rang salat', ku·rang-salat':
Re·ba p'lak nomil-panterang, Damsan damsan ku·rang
salat'.
Re·ba' wai, Re·ba' wai, Re·ba' p'lak nomil-
panterang.
2. Ka·sirokrok bangsi sikat', bangsi sikat';
“Sososoet” ku·simikat, ku·simikat;
Damsan damsan jakpa dokat', jakpa dokat',
Ka·sirokrok bangsi sikat', Damsan damsan ku·rang salat'.
Bangsi sikat', bangsi sikat', bangsi sikat' pilak
panterang.
3. “Dadingdachong” dama dokat', dama dokat';
Nomil “Gogai” doke niat', doke niat':
Nomil pante jikjakjikjak, jikjakjikjak,
Re·ba' pilak nomil-panterang, damsan damsan ku·rang
salat'.
Re·ba' wai, re·ba' wai, reba' pilak nomil –
panterang.

4. Wengwat-suet jaku ga·at', ja·ku ga·at';
 Songna-nokna kimko-kimko, bikbo-bikbo:
 An·sengriri mesatokna, mesatokna,
 Jangangchina ka·sirokrok, damstan damstan ku·rang
 salat'.
 Mesa' wai, mesa' wai, mesa' pilak nomil-
 panterang.
5. Re·ba pilak nomil-panterang, nomil-panterang,
 A·chik sulko janggamatbo, janggamatbo;
 Darang gipin sulna batat', sulna batat'.
 A·chik pilak nomil-panterang, A·chik sulko knatoat'-
 Re·ba' wai, re·ba' wai, re·ba' pilak nomil-
 panterang.

RING-CHOE SAKSANJOK

1. Atambal- ka·sinjok,
 Jajongba jateng·bajok.
 Chibiman' rikamo,
 An·senga roramo;
 Sam·bolrang nitoriri,
 Nikaijok an·sengriri.
 Nikani nitoriri...
 Ka·sine, ka·sine, ring-choe balpakna
 Chibimao an·sengriri.
2. A·sako nitoani-
 Gisikna katchaani-
 Ong·china kusin' baksa
 A·gilsako changsa
 Ka·srokan ku·rang sale,
 Ropana ang' ring choe.

Chibima saporiri...
Ka·sne, ka·sne, ring-choe balpakna
Chi-kosak balsri balsri.

3. Jateng·an ronggrikbejok,
Chibiman' chi-rong-nongjok;
Ringrang-ringrang nitojok
A·gimik teng·sujok.
Salgin' askirang nitoriri-
Chi kosak' chungchetari.

Gam·ani ka·sariri..
Jokanga chibiman chi-gam·ani baksa
Ku·rang ka·sri ka·sri.

4. Rasongni song nok gita
Ringrange nikata;
Man·genma basakoba
Indonga salko changsa?
Mikandala ang' a·sak
Chanchion ka·pak ka·pak.

Chanchion ka·pak kapak...
Ka·sara, mingnama, knatoa, nitoa,
Balponge aram kosak'.

5. Jajongba napsrimjok
Attamba waltingjok
Kimitjok gittim da·o jripjrang
Janggide jumangjok,
Ring-choe saksanjok.

Ring-choe saksan a·sak....
Ka·sine balpakna chi-kosak jumango
Aram pa·chap pa·chap

OHOMA

1. Akaruma kobokma sima chaama, sima chaama?
Nomil-pante an-sengao mesapanama, mesapanama?
Ohoma, Ohoma, Oe nanggo, Oe da-nang:
2. Lauma gonggedangana chia ko-jama, chia ko-jama?
Dama-dachi dokana ja-rikpanama, ja-rikpanama?
Ohoma, Ohoma, Oe nanggo, Oe da-nang:
3. Kotip bakjakjakari kabo pantea, kabo pantea;
Gana tengchap wentonge ganbo nomila, ganbo nomila.
Ohoma, Ohoma, Oe nanggo, Oe da-nang.
4. Sosoetna soetna bangsi sikana, bangsi sikana;
Ja-a ga-suetrimda angming mesana, angming mesana.
Ohoma, Ohoma, Oe nanggo, Oe da-nang.
5. Atam jajong jatengao ringe rokuna, ringe rokuna,
Jawa songni nomilming an-sengpakuna,
an-sengpakuna.
Ohoma, Ohoma, Oe nanggo, Oe da-nang.
6. Pante ong-arinasa pekmilangkuna, pekmilangkuna;
Maia chatchi de-aming singe nikuna, sing-e nikuna.
Ohoma, Ohoma, Oe nanggo, Oe da-nang.
7. Jajong jabitchimaona mesai ninamo, mesae ninamo?
Nomil pante kangrike ringe rona mo, ringe rona mo?
Ohoma, Ohoma, Oe nanggo, Oe da-nang.
8. Nang-ko bimumg man-kuja na-a sawamo, na-a sawamo?
Atcho, dama dokkuna watpakubomo watpakubomo.
Ohoma, Ohoma, Oe nanggo, Oe da-nang.

GOGAIWAI, GOSAIWAI, DIRENGWAI

1. Dama barat siringe dokbo gose chamea,
Bangsi gital so·pue sikbo noba na·ara,
Go... Gogaiwai, Gosaiwai, Direngwai.
2. Dama bidap chitinge dokna gose angade,
Da·a walde waltinge “Direng” dokna anchingde.
Go... Gogaiwai, Gosaiwai, Direngwai.
3. A·an timtim ga·nabe, a·banggiri monabe,
Chian chokchok ronabe chibanggiri satnabe.
Go... Gogaiwai, Gosaiwai, Direngwai.
4. Da·si re·bagipako namnikama panteko?
Nang·ming “Direng” dokrimna don·nok anga damako.
Go... Gogaiwai, Gosaiwai, Direngwai.
5. Biri agal so·ani wal·ang anga nikatjok,
Chame Tura jilani ku·rang nama kinajok.
Go... Gogaiwai, Gosaiwai, Direngwai.
6. Ku·ba e·ching bisoksi simildingding simila,
Ku·rang sala gaanti da·sionin kinara.
Go... Gogaiwai, Gosaiwai, Direngwai.
7. Do·kuasa chirengrip roa gose pantede,
Kini chita chi·jengbit do·ka manggisim gita.
Go... Gogaiwai, Gosaiwai, Direngwai.
8. Delang buchu wensoke rona gose angade.
Do·sadipil onchoke “Direng” dokna an·chingde.
Go... Gogaiwai, Gosaiwai, Direngwai.

9. Gangguasa engenga an·chi opna man·jaeming,
Songonisa miknenga angko nina sikjaeming.
Go... Gogaiwai, Gosaiwai, Direngwai.
10. Chu bisire ringesa da·nang peka daktoka,
An·tangtangko dondape ma·a noa intoka.
Go... Gogaiwai, Gosaiwai, Direngwai.
11. An·cheng sori soreo na·bat koirang manggni,
Samsi bandil bandilo pante ro·reng sakgni.
Go... Gogaiwai, Gosaiwai, Direngwai.
12. Balsri balwa balana bola bijak moasa,
Angming “Direng” dokrimna nomil te·rak na·asa.
Go... Gogaiwai, Gosaiwai, Direngwai.
13. Ramasamni me·apek bambek ‘noba angade,
Chame ra·e ronaba kirapaja pantede.
Go... Gogaiwai, Gosaiwai, Direngwai.
14. A·sesamni te·bibal bite nangna balenga,
Baoni pante ro·rengbal maina bo·e roenga.
Go... Gogaiwai, Gosaiwai, Direngwai.
15. Do·bisako balgipa da·nang do·reng gakasi,
Jilla nina inode rebo Shillong Gauhati.
Go... Gogaiwai, Gosaiwai, Direngwai.

SALSAMANGMANG AN·SENGNA

1. A·dingsiri-sirio. Mite- mande peng·pango,
Songdu- sagal- niwatna, Balwa rippang ringsikna;
Sikko- doba balliping kae, Gue moja supari cha·e
Rona ‘noba da·alde, salsamangmang an·senge.

2. Bolasari ja·pango, samsi bandil bandilo,
Rotoriri a·songna, Ka·sariri golpona;
Ka·sirokrok bangsiko sike, wa·pang sumeratako done
Rona 'noba da·alde, salsamangmang an·senge.
3. Rong·ma rikkim pattalo, do·amekni wilwilo,
Songdu jahat niwatna, nike gisik pang·sangna;
Ripeng baju namako, katta ring·na changako,
Rona 'noba da·alde salsamangmang an·senge.
4. Rona·chona inoba, degirisa an·senga,
Attam bangsi sikoba, panteosa niksenga;
Katta ku·rang bangsina sale, mika·mikjip ka·dingsik ring·e.
Rona 'noba da·alde, salsamangmang an·senge.
5. Roa·choa inode, inbo gose da·alde,
Jeba ong·bo ropana Ranggirako niwate
Sona·misi riprangko nie, tangka baoriramko sane,
Rona 'noba da·alde, salsamangmang an·senge.
6. A·ding 'biri pattalo, silang rong·gitcherao,
Mande gita golpona, mite ganda wilwalna
Gisikrara mitesak nike, manderara Ranggira wene
Rona 'noba angade, salsamangmang da·alde.

SIKATANG

Sika, sikatang, p'ilakkon brena nanga gri:
Brena man·gijarangba chingni,
On·giminrang sikatang ra·ani.
O, k'nabo gam·enga gitni sulrang,
Boldimgrimo katchaan' ku·rang,
Knatoriri ringenga do·drang.

Tangseka 'brirang 'ching roramrang,
Rimitchip chaa mi-misirang,
Niwatto' a·du tangsim pang·sang-
Sal-kari soka jensalo – sikatang.

Jawan' rasongde 'chingna batja,
On·giminrangko teke donja,
K'nabo, katchaan' ku·rang a·sak gapchina,
Sika, skatang.

MIKKANGTANGO GITA

1. Dikdik salrang ong·aioba
Ru·uta bilsirang gita,
Songchel·achisa ong·oba
Mikkangtango gita,
Nikatenga nang·ko gisiko
Riprapa jagringo
Kimitgenma nang' jagringko
Riprapgen andalao.
O... O... ...
2. Watatgenma kobor changsa
Mikka aram baksa;
Balbring balbring jipjang jipjang
Re·baenga gita,
Rimit rimat mesokgenma
Changsa tusidapate
Ku·rang ka·sri agantaigenma
Ku·chimitmit niate.
O... O... ...

3. Basakoba changsamangmang
Rasongni teng·suao,
Rinok-terok nang·ni bimang
Ang baksa sambao-
Tangsim rikrak nitoriri
Chibiman' rikamo
Ka·sinjrimjrim balwa balsri
Jateng·an attamo.

O... O... ...

4. Dukrang chipakkore gita
A·gilsak pokpekon,
Ka·saa bibal rongrikbea
Ga·ake dimelon;
Dongkugenma nang' jagringde
Jumango gitade,
Teng·kugenma nang ka·saade
Ui·ja angade.

O... O... ...

SAKSAN SIKDIKDIK

1. Saksan sikdikdik
Ong·an somoio,
Gisiko dikdik,
Nang·ko chanchio;
Ka·a suangwang
Nikata nang·ko,
Na·asan mangmang
A·sak gimiko.

Saksan nang' dongjao ang' sambao,
Saksan nang·ko nikjan' somoio.

2. Jumango gita
Nang·ni ku·rangko
Knataikugenma
Basak'ba changsao?
Ka·dingtaikugenma
Kratcha·e mikkango
Ka·sariri nie
Atam jatengao?

Saksan nang' dongjao ang' sambao,
Saksan nang·ko nikjan' somoio.
3. Simila gita
Bibalni balo,
Ka·sroka gita
Ka·san' ku·rango,
Katchaani chimik
Nang·ko gisik ra·o,
Guale dikdik'
A·sak dukrangko.

Saksan nang' dongjao ang' sambao,
Saksan nang·ko nikjan' somoio.
4. Nang·gitan tiktak,
Aski rongsako,
Teng·enga srak-srak
Nikgen salgio?
Nagenma unon
Aski ang' sambao,
Janggi neng·takon
Jringjrot salgio?

Saksan nang' dongjao ang' sambao,
Saksan nang·ko nikjan' somoio.

JARANI KORE DOKA

1. Kore doko kore dok'
Kore doke rogini –
Cha·e nio rongbol dok
Cha·na man·o cha·gini.

Jara solo ka·dingna
Wagamai wabrakbrak
Cha·na man·jao tusimna
Oksangkapkap gangborak.

2. Gisik a·ning bitangkal –
Bitna wa·sagipade,
Kotaningko salangkal
Taning mikmakatnade.

Bolna wa·na ka·dingna
Wagamai wabrakbrak,
Cha·na man·o cha·pana
Bikma kring oktinggak.

3. Lekka-pora man·angkal
Lekka chiprakgipade,
Sena-jotna sapangkal
Gisik tiktakgipade.

Mejasalko salnikja –
Gingma-gingpel gingsidep,
K'nasalko kinaja
Jara miksildogetget.

4. Nokma raja ong·angkal
Nokma tokrakgipade,
Tangka jengbong donangkal
Jengbong kebitrakode.

Kore doko kore dok
Kore doke rogini -
Jara sole robojok
Sawa badinpa·gini.

5. A·king-gore man·angkal
Kange kingkangatnade –
Rasong mikkim chuangkal
Gingmat chagatgipade.

Nama-namja chinapja
Jarasimsim mikgilgep,
Tangka-sona gamchatja
Jarawakwak ginggepgep.

6. Nokdang-ba·ku dakangkal
Dongnanggipa bipade,
Jikma-jikse dongangkal
Donge rona inode.

Dukko-sukko chinapja
Jara ku·chi rorara,
Kena-sia cha·totja
Bigil wakbigilara.

7. Songko-nokko dilangkal –
Dil·diljawa inode,
Torom rama re·angkal
Toratangko watode

Kore doko kore dok·
Ringgijaba pekgni
Cha·enio rongboldok
Cha·gijaba rakgini.

8. Gamu rim-na gong·angkal
Rim-na tektakgipade,
Mia jamo pakangkal
Pako okkagipade.

Kore doko kore dok'
Kore doke rogini,
Cha enio rongboldok
Cha-na man·o cha·gini.

9. Jara solo ka·dingna
Wagamai wabrakbrak,
Doke galo sipana
Ja·bra-jakbra gangborak.

Kore doko kore dok'
Kore doksrangaigini
Cha-na man·o rongboldok
Cha·e sisrangaigini.

CHA·ASIA

(“Ritimkari” poedooniko ra·ongkatgimin)

Dandak-dandak chong·doc a·sal sakna danbajok,
Rajan' nokna batpile gamseng mitap jin·bajok;
Indioba sari-gri mikgil mitapsnich
Simakjawa niari mikchipenga gisikchi.

A·ba-bolgrim burungrang aganprakenga gita-
Do·o- matni ku-rangrang rasong on·enga gita.
A·song balnang balsiri mande sakna balnama,
Gisik mangmang ka·siri dukni salo guala.

Gose da·nang indiba rongjanggide ran·aha,
Bils-kari sokoba indin ong·gramaiaha.
Nitogipa bario teng·suani dimeljok,
A·sal dandak chong·ao a·song cha·asibajok.

Songo cha·asimiting da·nang game- cha·gipa,
Ta·buringo tangmiting cha·na migirigipa.
Bi·sa·desa ram·miting gimin cha·na alsokjae,
Gamgipa bil·be·miting okna a·ba·re·ange.

Atam a·basokbao ta·buringko ritgope,
Cha·arijok noktango bi·sa·desa okgape.
Samjak·me·su ritako okgapatna cha·ani
Okchirippet dakako nikjok bi·sa·desani.

Mia·merong rongsaba rongjanggiko sikjajok,
An·gil ching·kalgipaba dengdobikbik dakajjok;
Ja·a jakgolangsijok bi·sa oktongsisirang,
Gren·guasu nagaljok bilgilari ba·rangrang.

Te·brong bite rongrongte nike ku·chi minoka,
Ku·chi mittap nitate ake cha·e nimana.
Tokchang·tokchang samtangtang songna dukni sokbajok,
Da·nang saoba- saobarang wal·ko·chikon sikjajok.

A·ki·a·sal jimgijao samsi chagija gita,
An·gil daknanggipako kini rokgimin gita:
Bimang manggisi gita bibal bari jatchio,
Gangma minenga gita mikkang sona bibalo.

Pattigimin mandena rippingchina nimakon,
Mite- Misi-Saljongna Kamal wachi tatjakon;
A·songari wangdate cha·gipachi pakmakon,
Chasong rikit wa·rame gisik do·tekmeakon.

Pattigimin rasongko mande a·nangatjokma?
A·song-kosi gimiko marang jo·oldapjokma?
Ong·atgimin rasongna ringrang mesokanima?
Ringrang Ritimkarina mande kiratcha·jama?
